

四庫全書

史部

欽定四庫全書

皇朝通志卷八十六

食貨畧

六

蠲賑

上

臣等謹按我

國家

列聖相承澤周四海

念左藏之充盈嘉民生之悅豫蠲賦免漕迭周寰宇間



遇直省偏災莫不先事

周諮蠲賑備舉截漕發帑動輒數千百萬奏報嚴其限
展賑寬其期

深仁厚澤尤逾常格茲纂輯食貨畧謹增蠲賑一門詳
書於篇分為上下卷

順治元年

王師入關即

詔除明季加派三餉及召買津糧在京城遭賊寇蹂躪之

後遷徙者免賦役三年大兵所經免本年田租之
半其河北各屬本年田租免三之一凡八旗壯丁
差徭糧草布疋永停輸納二年以山西地方初復
免本年田租之半始定八旗賑濟之例凡八旗澇
地每六畝給米二石王貝勒貝子公等府屬人役
給米如之其帶地投充人役不准給口外八旗蒙
古被災按口給銀聽其沿邊糴米毋令進口八旗
遊牧地每口月給米一斗在張家口者給米在古

北口者給銀

按是年除江南丹陽丹徒二縣加派馬折銀及福建落地稅皆明季所增

嗣後陸績豁免

三年除直隸任邱縣鹹水浸地租賦免江

南漕三之一其潛山太湖英山霍山諸縣盡除之

以江西疊被旱澇豁免本年漕米之未兌運者時

湖廣興國等十州縣旱直隸成安七縣水免本年

田租嗣後直省凡遇偏災均察明田畝豁免本年

租四年免江南徐州淮安二屬無主荒地錢糧五

年大兵經過湖廣岳州等處免附郭錢糧之半餘

三之一衡州永州辰州靖州附郭免十之七餘免
半以山東朝城罹土賊之患除遞年逋欠糧米定
各直省駐防官兵應給澇地米隨家口所在支給
六年定直省被災督撫即詳察頃畝分數具奏其
有應蠲免之處於起存項下均減如存留無餘即
於起運款內減除其有司藉稱無項可免使民不
沾實惠者論罪七年免江南桐城潛山太湖宿松
休寧句容六縣逃丁荒地額賦又免湖廣之蘄州

麻城羅田蘄水黃梅黃岡六州縣荒田額賦八年
除山西荒地額糧西安新荒民屯廢藩地賦及浮
報丁銀又除直隸交河芝麻棉花折征額賦時山
東浙江水以倉穀賑窮民以學租賑貧士定凡地
方被災有司勘明後一切應征錢糧暫停徵比俟
題蠲後該州縣以應免數目刊免單頒發已徵者
准抵次年正額官胥不給單票以違

旨計賊論九年除陝西莊浪西寧肅州所屬故絕拋荒水

淹沙歷地賦十年賑八旗貧人滿洲蒙古每佐領
下給布六十疋棉六百斤米百石漢軍每佐領下
給米布棉半之又定災蠲之等凡被災八九十分
州縣免田租十分之三五六分者免二四分者免
一有漕糧州縣衛所准改折又定勸賑之例凡遇
災士民捐賑米五十石或銀百兩者地方官旌獎
米百石銀二百兩者給九品頂帶多者遞加品級
十一年減江西袁瑞二府浮糧分勘旗人墾地以

到通漕米給滿洲蒙古每佐領下二百石漢軍每
佐領下百石旱地每六畝給二斛本折各半其守
南苑海戶災不論旱澇每六畝給米一斛是年直隸
保定等八府旱除免本年田租外發部庫銀十六
萬內帑銀八萬分賑饑民又

詔除該省順治六七兩年逋賦增定勸賑例見任官並鄉
紳捐銀千兩米千石以上者加二級半者紀錄二
次銀百兩米百石以上者紀錄一次生員捐米二

百石准貢俊秀三百石准入監肄業十二年令各省地方照京城設廠煮賑事竣將捐輸官民姓名銀米實數彙報議敘十三年

詔除江西頻年逋賦又除直隸八九兩年逋賦時直隸新樂等處蝗賑旗人滿洲蒙古每佐領米三百石漢軍百石其富族家人充丁者不與其旗人被災地每六畝米一斛又

特諭發帑銀三萬兩賑貧民十四年直隸霸州薊州等七

州寶坻等屬二十一縣保安等三衛梁城一所電
武清灤二縣水免本年田租並發內帑銀十萬分
賑旗丁民戶十六年雲南貴州新入版圖發帑十
五萬兩賑卹十七年定報災之期凡直省被災有
司先以情形入奏夏災限六月中旬秋災限七月
中旬州縣官按期申詳上司上司以報到之日為
始如有逾限半月以外分別議處

康熙元年蠲除江西之新建豐城進賢奉新靖安

五縣浮糧時江南海州近海居民頻罹潮患遷入內地所逋糧石悉予蠲除定八旗被水災地每六畝給米二斛蝗雹災每六畝給米一斛二年

詔直省自順治十五年前民欠銀米物料概勿收責其廣東福建沿海無主田租悉予豁免三年定凡遇災傷之地督撫題報即令該州縣停徵錢糧十分之三時直隸莊田被災賑米粟二百一十三萬餘斛四年定凡遇災該州縣以被災情形申報布政使司

布政使違限照州縣道府處分又從左都御史都
性納請凡災田賦免若干丁賦亦照免若干俾貧
民恩澤均沾是年

詔除天下自順治十六年至十八年逋賦以山東寧海棲
霞等處被兵疫除荒地亡丁徭賦六年甘肅寧州
六州縣疫田賦丁銀並免又定凡應蠲免州縣如
有已經輸官不流抵次年正賦及不扣除應蠲分
數一概徵比或經題免分數後不即出示曉諭或

稱止蠲起運不蠲存留或於由單內扣除不及蠲數者該有司以違

旨侵蝕論上司不行詳察並議處其流抵實數不詳載次
年由單之首者如之七年直隸水被災五十州縣
災成九分十分者除其租七八分者免十之四江
南淮揚二屬水按分數加免一分災較重者漕白
二項分作三年帶徵河南之安陽臨漳水給復三
年又申明滿漢文武官弁及紳士富民捐助賑卹

議敘之例八年

詔除江南等省康熙元年二年三年逋欠地丁錢糧以平涼臨洮鞏昌三府屬被災豁除賦銀七萬八千三百兩糧十六萬三千石又除陝西鄱縣砂石所歷荒地租九年定凡遇災蠲賦並免田戶之租除江南淮安揚州二屬之邳州海州宿遷沭陽通州泰州六州縣坍田額賦以淮安揚州數被水災免本年漕及六年後逋漕銀米以山東先年地震免賦

銀二十二萬七千有奇其金鄉等縣本年應徵漕糧分作三年帶徵是年賑湖廣竹山縣被火災民十年江南淮安揚州二屬俱被水免康熙元年至六年逋賦

遣大臣會同該督撫截漕協濟鳳徐等府並發倉米賑卹人給米五斗六歲以上十歲以下半之並設米廠食饑者每人日給米一升三日一散部差司員監視又八旗屯地旱賑米百六十四萬七百石是年

上以巡幸經過通州以東至山海關本年額賦悉令除之

又除河南陝州江南靈壁臨淮諸荒賦又准凡從

前地方官捏報墾荒致民賠累者勘明豁除又定

凡蠲除漕糧並蠲隨漕銀米又以浙江臨海等五

縣溫州一衛頻年饑饉自康熙元年至三年隨漕

行月逋賦悉除之

嗣於明年又免石川縣康熙三年輕贍銀及平陽縣元年至三

年月糧及 隨漕逋賦 十一年

上諭江南連年水旱民氣未復著將舊欠錢糧並本年帶

徵舊欠漕白銀米俱暫停徵其邳州等五州縣額賦加免二分沐陽漕項銀並免興化等五州縣大河一衛本年額賦及新舊漕糧銀米概予放除是年又

詔除各省逋賦凡康熙元年至三年江南之儀徵衛三年至五年湖南之常寧縣四年至六年陝西之西安鳳翔漢中六年浙江之太平松陽景寧湖南之衡州衛七年至九年湖南之各府屬九年江南之泰州江都山陽十年高郵之湖地山東之兗州凡未

入與入而未備者悉除之十二年山西饑發銀二十萬兩

遣部員會賑十三年蠲浙江臨安等四縣逋欠錢糧銀米又除江南丹徒金壇濱江坍沒田租十五年定凡蠲免錢糧州縣官增造糧冊及未經題免之前報冊填入蠲免者並該管上司一體論罪時以陝閩被兵除其賦并除陝西屬宿逋十六年免江西廬陵贛州等四十一州縣衛所被兵荒田本年租賦

十七年更定災蠲之等凡災成六分者免賦十之
一七八分者免二九十分者免三以浙江近閩各
州縣衛被兵除上年田租十八年定凡流抵錢糧
應蠲已徵者給與紅票次年按數豁免蠲賦官侵
蝕者照貪官例處分上司不行稽察者並論罪是
年以江西福建被兵蠲歷年逋欠以山東災賑沂
州十二州縣饑民以直屬地震發帑十萬賑旗民
十九年除廣西去年田租免江南十二年以前逋

賦其十三年至十六年逋賦分年帶徵二十一年以山西太原大同連歲被災民多流亡除逋賦二萬四千四百餘兩以福建侯官二十六州縣被兵之後除十八年以前逋賦二十三年

詔江南江西浙江湖廣四省自用兵以來供應繁苦免來歲運兌漕糧三之一其自十三年至二十年積欠漕項錢糧每年帶徵一年二十四年浩齊特以所屬蒙古饑請賑

遣官運拜察儲粟千石往賑二十五年江南蝗電

特遣大臣往賑鳳陽徐州災民除徽州廬州鳳陽三府逋
負銀米其直隸順天永平保定河間四府貴州湖
北湖南福建四省明年地丁各項錢糧及本年未
徵額賦普行

恩免又免直隸之正定順德廣平大名四府田租二十六
年

詔自用兵以來動用錢糧累歲未清者皆予除洗又

諭江蘇陝西來年應徵地丁各項錢糧及本年未入者概行豁免又普免十三年以後加增雜稅二十七年

上南巡免江南省歷年積欠丁糧屯糧蘆課米麥豆稅及安徽府屬上年地丁漕糧其直省自十七年前民欠漕銀米麥通行豁免是年以雲南供億大兵免二十一年以後逋賦其鶴慶劍川地震死者每名給銀一兩傷者半之屋壞者每間給銀二兩無棲止者人給穀一石幼者半之嗣後凡遇地震有傷

田廬人口者援以為例二十八年

詔免江南邳州淹沒田賦及歷年逋欠以直隸旱撥戶部銀三十萬兩賑濟二十九年

諭廣東高州瓊州二府所屬賦糧累年逋欠該督撫將實係戶口稀少田畝荒蕪積欠數目條晰具奏於是除高州府吳川縣瓊州府臨高澄邁二縣遞年逋欠十有二萬八千六百兩米四千六百石以直隸災免順天保定河間真定順德廣平大名宣化各府屬

上年未徵及本年春夏額賦銀五十七萬五千兩
糧八萬六千餘石三十年

詔免天下漕糧除江南睢寧縣廢闕地丁額賦通州海門
鄉坍田銀租免江西南昌等五府廣東高瓊二府
田租又免直隸保安州及江西之吉水縣遞年帶
徵逋賦是年陝西旱蝗蠲西安鳳翔二府屬民屯
各賦山西蝗撥五臺崞縣儲米借給岳陽等八州
縣災民撥太原大同二府屬買貯捐米借給夏縣

聞喜等十五縣災民撥山西司庫銀二十萬兩赴
陝充賑每大口給米三合小口半之折價視時值
直屬被旱者七十七州縣每大口給米四合小者
半之三十一年蠲雲南鄧川州水衝田賦免廣東
化州瓊州等州縣十八年至二十九年逋賦以山
東存貯捐穀二十八萬九千餘石借給窮民以資
春耕以陝西北歲荒疫免明年額賦並動該地捐
銀借給西安鳳翔二府屬災民籽種之用明年

上猶念西安鳳翔二府民氣未蘇今再免來年額賦以雲
南貴州廣西係邊境瘠壤豁免來年地丁銀米時
直隸順天保定河間真定四府水免本年被災田
租及來年額賦並除歷年逋欠三十三年

上南巡免山東江南經過各州縣衛所丁銀及江南邳州
遞年逋賦以山西平陽等屬前被蝗旱免遞年積
逋以直隸順天等屬上年水賑安州等十一州縣
災民三十四年山西平陽府地震

遣大臣往賑死者大口給銀二兩小口七錢五分葺屋戶
給銀壹兩其直隸宣化府霜災免本年及下年田
租時又豁除山西河津滎河等處河壩坍沒田賦
三十五年

命天津賦銀宿逋皆予豁除時

王師進征厄魯特噶爾丹免大兵經過之直隸宣化山西
大同二府屬及陝西一省一年租賦又直隸寶坻
等三十二州縣水所有錢糧先行豁免

特諭該督撫責成地方賢能官察勘窮民支借倉米三十

六年

詔免山西甘肅明年租陝西沿邊州縣衛本年田租江南

蘇松等屬歷年逋賦三十七年以山東濟寧兗州

東昌三府屬比歲不登

命部臣保舉賢能司員二人會同該撫散賑以淮安揚州

鳳陽等處頻年水患久歉之後資生匱乏免山陽

安東等二十一州縣衛所明年地丁銀米漕糧及

高郵等六州縣舊年丁賦三十八年

上南巡詔免江浙二省三十六年以前逋賦以淮安揚州
二府屬上年被水所有海州山陽安東鹽城江都
高郵泰州興化寶應九州縣淮安大河二衛上年
未完地漕銀米及淮揚三十場竈戶上年及本年
鹽課並二屬明年地漕銀悉予放除又免鳳陽府
屬十一州縣及泗州所上年地漕銀米以山東泰
安等二十七州縣從前被災豁免三十六年未完

地丁銀米其三十七年錢糧因災寬至本年征收者分三年帶徵其直隸薊州三十二年退地逋負江寧市廛房號廊鈔銀兩浙江鄞縣海潮衝沒田租至是悉予蠲除又直隸贊皇縣民人向因土賊逃亡及今復歸著借給倉糧以安定之三十九年免湖廣地丁銀兩四十年江南泗州盱眙河溢免賦並除淹田逋租以直隸霸州文安大城三縣地窪易潦除歷年逋負賑甘肅河州屬被災土司四

十一年

上以秦省不通水運河西一帶瘠磽免本年及明年錢糧
尋又運西寧米借給西安窮民四十二年

上巡幸山西免該省去年逋賦時山東水九十四州縣災
按等免賦復

命戶部官馳往截漕五十萬石委八旗官各支庫銀三千
兩協同地方官賑濟又除泰安郟城等七州縣上
年未完錢糧又免江南徐州邳州睢寧縣及河南

省民欠逋賦賑鳳陽所屬饑民是年免安徽全省
錢糧四十三年免山東河南雲南貴州廣西四川
六省地丁漕糧其山東屢年民欠亦著免徵定河
南見存倉穀每年存貯一半備賑一半借給四十
四年免浙江省錢糧以山東比年歉收直隸順天
河間二府米價騰貴再免錢糧一年

諭嗣後遇蠲免之年如並免積欠則帶徵俱免如止蠲本
年則舊欠亦俟次年徵收著為例四十五年免天下逋

賦其已入者作本年正賦

按是時直隸銀八萬二千七百兩糧五千九百

石山東銀一百六十九萬一千七百兩糧五千九百石山西陝西甘肅江蘇安徽江西浙江湖北湖南廣東銀二百一十二萬二千七百兩糧十萬五千七百石皆邀

恩免

四十六年

江南浙江旱除免災賦外又免兩省來年丁銀田

賦及江蘇四十三年以前漕項銀米麥令江南總

漕會同該督撫察勘被災州縣截留本年已兌漕

米以濟倉穀之不足其徐州淮安揚州三府倉無

存穀動司庫銀十五萬充賑四十七年再免江浙

兩省明年地丁銀以去年被旱故也四十八年江
南淮安揚州徐州三府屬河南歸德府屬水山東
兗州府屬旱各如例免租又免災田來年額賦以
浙江災後民力未紓所有因災緩徵漕米悉除之
四十九年免

盛京奉天錦州承德等府縣明年租穀除江南荒地
租銀時福建漳泉二郡旱

命截留鎮江漕十萬石運至狼山松江漕十萬石湖州漕

十萬石運至乍浦著該省總兵官用戰船接運漳
泉充賑又從兵科給事中高遐昌請凡遇免租之
歲田主免租七分佃戶三分著為例是年奉

恩詔於五十年普免天下錢糧尋定分省輪免三年一周
總計所免天下屆徵正額及屢年積欠共銀三千
八百六萬四千六百九十七兩緣蠲免之例稻穀
不應入蠲而福建之臺灣有穀無銀五十年間省
屆輪免之期臺灣歲租已入巡撫黃秉中以聞

詔於明年之應徵者除之是年又免

盛京之承德等縣應徵米豆五十一年免陝西西安
租以山西大同府陝西潼關衛本年應免之米豆
薪芻已徵在官者

詔於明年之應徵者除之五十二年免山西河南陝西西
安府及會寧等處田租除江蘇荒地銀

詔直省編審人丁以五十年丁冊為額其餘謂之滋生人
丁永不加賦五十三年免天下房地租稅及積年

逋欠除浙江奉化縣水沒田賦時甘肅靖遠二十
八州縣衛所旱

詔免明年額賦糧草

命大臣前往察勘五十四年直隸順天保定河間永平宣
化五府穀耗不登免來年額賦又蒙古被雪運穀
賑烏喇特十四旗察哈爾八旗兵民五十五年免
直隸通省銀米穀豆草束是時策妄阿拉布坦侵
擾哈密設鎮兵備邊

上念沿邊一帶兵民効力令自山西大同府屬前衛右衛
大同懷仁馬邑至陝西延安府府谷神木等四十
二州縣衛所堡來年額徵賦銀糧米豆穀草束並
從前積逋概予放除以直隸水溢撥通倉米二十
萬石賑濟順天永平府屬五十六年

諭直隸去年雨水過多田畝間被淹沒今雖有年然僅足
支一歲之用著將順天永平兩府所屬州縣及山海梁
城等衛所本年地丁銀米豆高粱及屢年積欠之銀米

豆高粱魚新舊草束通行蠲免又免直隸江蘇安徽江西浙江湖南湖北陝西甘肅等省帶徵屯衛銀其江蘇安徽帶徵漕項銀米麥豆各除其半五十七年免陝甘兩省逋賦及明年田租又索倫水發銀一萬兩

遣官賑卹又發

盛京倉賑扎賚特固山貝子特古斯屬下窮丁五十九年以沿邊民勞轉輸免陝西延安府谷神木等

六十六州縣衛堡額賦時福建臺灣颶災人民房廬多被損傷免番民銀粟照賑卹例散賑其淹沒兵民照出征病故賞給又陝西饑直隸延慶等五州縣地震撥運銀五十萬並陝甘二省所屬常平倉穀百三十餘萬石

遣大臣率部院官分西安延安蘭州三路賑濟其直隸地震災民

命大臣一人協同地方官如例賑卹以兵興故再

詔免陝甘二省來年額賦明年以陝甘二省值災後撥解
庫銀二十萬兩借給籽種時陝西復旱

命大臣往勘除其租六十一年

遣大臣賑直隸贊皇等四十二州縣饑民並發米煮賑是
年

世宗憲皇帝即位以古北口一路為

聖祖每年行幸之地三河一路為

陵寢經由之路令豁免大興宛平順義懷柔密雲平谷昌

平三河通州薊州遵化十一州縣來歲正額錢糧
時陝西歲徵地丁銀每錢浮收三釐米每斗浮收
三合以為備荒之用

上以徒有加賦之名而無賑濟之實

詔永行停止如有舊欠亦並豁除

雍正元年

詔免江蘇等屬康熙以來逋賦及直隸宛平等十一州縣
本年田賦雜稅其旗地遞年逋糧陝西康熙六十

年以前未入銀米豆草並除之以山東濟南兗州
東昌青州四府上年災出司庫銀十三萬散賑直
隸河南亦災俱發倉截漕充賑其糧種無資者量
助流亡者招集復業又郭爾羅斯喀喇沁扎魯特
各旗饑發帑七萬兩充賑二年

詔普除天下康熙五十年以前積欠並豁免雜項銀米除
浙江仁和等十州縣水衝沙地租及江西南昌新
建豐城進賢奉新寧州靖安七州縣浮糧賑蘇尼

特四旗人動帑二萬兩三年減江南額賦蘇州府屬三十萬松江府屬十五萬永為例又除丹徒縣濱江坍沒田租及臺灣鳳山新番歸民口賦時直隸饑截發倉米三十萬石賑濟江南睢寧宿遷二縣水用積穀煮賑定凡貧乏兵丁需借米穀者該管旗員詳報督撫州縣驗實取該管旗員印領借給凡民間出借米穀州縣按名面給秋熟後按戶繳完不使假手吏胥若吏胥朦濶虛領追欠無著

吏胥治罪欠項向州縣追賠仍以失察例議處四
年安徽所屬水賑無為望江等州縣衛所及泗州
等處折銀按戶散給五年減浙江嘉湖二府額賦
十之一永為例時直隸江南浙江湖北湖南俱偏
災各發帑賑濟六年除陝西西鄉縣浮糧免直隸
來年起運銀四十一萬七千八百餘兩福建康熙
五十五年以後逋賦三十三萬八千三百餘兩更
定災蠲例凡十分者免賦十之七九分者六八分

者四七分者二六分者一凡賑濟勘災給糧有司
官親臨毋假手胥役里甲近城之地設粥廠遠在
四鄉於二十里各設米廠賑畢刊刻所賑銀米數
目戶口姓名日月曉諭貧民以杜胥吏中飽七年
除湖南武陵縣宿郎堰湖濱淹沒田賦以西藏苗
疆平定免甘肅山西廣西雲南貴州明年祖免西
安田賦十之三八年免直隸山東廣東陝西山西
安徽額賦各四十萬浙江民屯田租十之二時南

河溢河南山東江南濱河州縣田廬俱被淹北河亦溢直隸順德諸府災又

京師地震損傷房屋乃免南河被災州縣漕米賑濱河饑民並給銀以葺廬舍之水毀者

遣侍郎都統科道翰林分四路各領銀二萬兩仍截留漕米大賑直隸被水災民另派官分五路賑地震被災之旗丁每旗賞銀三萬兩按名分給時湖南永順土司改土歸流照原額秋糧分則陞科仍免科

一年九年免直隸江西湖北湖南山東本年額賦
各四十萬以大軍經過免西安地丁銀十之三甘
肅全免並加免陝甘二省銀四十萬又免甘肅之
河州廳洮州衛歸德所西寧涼州府番民本年米
芻時有江南河工占廢之民屯田賦淮安府阜寧
縣射陽湖題升淤地租陝西武功縣之坍沒田租
福建鳳縣地闕額賦銀皆有銀無地悉予除之十
年免甘肅本年未入額賦次年普除之以臺灣彰

化縣經凶番擾亂耕種失時其八年九年未入銀穀悉予豁免十一年免河南本年額賦四十萬甘肅二十七萬九千三百餘兩

諭雲南元江普洱兩府猺夷蠢動夫役頻煩之後小民輸將維艱將二府屬本年額徵條銀公項銀並行蠲免時江南海潞常熟等二十九州縣災直隸豐潤薊州等處水咸如例賑卹是年賑科爾沁窮丁六千六百餘名十三年免雲南貴州及湖南之沅州田賦

又令貴州所屬州縣給復三年是年九月

皇上登極

詔免天下田租及雍正十三年以前逋欠隨

諭勸業戶各計所免之數捐十分之五以惠佃農以

陵寢興工除大興宛平良鄉涿州房山涑水易州各州縣


明年租以甘肅雨澤愆期豁免地丁錢糧

諭蘇松浮糧已蒙

世宗憲皇帝裁免四十五萬兩而額糧尚有浮多之處再

加恩免額徵銀二十萬永為例其餘奉

恩詔豁免者直隸旗丁退入官地畝銀租山西大同偏
關老水泉三汛兵丁徭賦太平縣江夫河蓬雜賦
貴州被賊寇州縣本年租糧四川各土番本年貢
賦西安明年地丁甘肅半之並予放除



皇朝通志卷八十六

欽定四庫全書

史部

皇朝通志卷八十七至九十七

編修臣錢樾覆勘

總校官編修臣倉聖脉

欽定四庫全書

皇朝通志卷八十七

食貨畧七

蠲賑下

乾隆元年

詔除天下浮糧凡江蘇之桃源宿遷睢寧三縣新淤涸

後改科地糧安徽所屬之泗州五河兩岸淤地額

賦河南滎澤縣河旁坍塌地銀及籽粒銀鄭州臨

河之姚店等堡鰾鹵地糧祥符等四十二州縣鹽
鰾飛沙坍淤荒地額賦山東鹽城等二十八州縣
衝壓地賦章邱縣捏報墾荒地賦直隸呂家灣等
處水衝沙壓浮糧及有糧無地或糧存人亡之項
甘肅因地震缺額丁賦及狄道縣缺額地糧並有
額無征各項福建南平縣浮多丁賦陝西坍地徭
賦江南網戶鱗魚折色銀悉予豁免是年浙江仁
和等四縣水免漕白南米湖北漢川江陵水免賦

銀及南米雲南貴州災免該省及接壤之湖南沅
州府本年田租江南海州阜寧鹽城興化上年被
水免未兌漕米及因災緩征漕米又定嗣後遇災
四五分者亦加

恩免十分之一著為例

諭直省因災察勘戶口造具冊籍所需飯食舟車紙張
等費皆量動存公銀毋絲毫派累地方二年以經理
山陵大事自京師至易州民人趨役勤慎免本年額賦以

陝西寶豐新渠二縣招墾新戶安業未久悉除積
欠額賦其涼州西安等處番民糧料照屯地科則
免三之一定凡遇災傷督撫勘明或分年帶征或
按分數蠲免具題請

旨至丁銀向未攤入地糧例不並免今既歸於一令嗣
後遇災蠲之年統覈均免其期以奉

旨之日為始凡部文未到之前已輸在官者準抵次年
正賦時江蘇阜寧鹽城二縣有濱河地畝淹涸靡

常有司誤報陞科與山東商河縣鰥鹵不毛之官
莊地畝錢糧江蘇高郵等五州縣隄工民房租銀
甘肅河西各州縣衛所隨徵馬糧皆係荒浮累民
詔悉除之是年免甘肅錢糧西安半之三年除四川射
洪等六縣坍沒田租免直隸逋賦及宣化永平之
糧草旗退入官之地租各逋賦

諭直省各府州縣學田無多遇歉歲貧生不能自給又
不便令有司與貧民一例散賑嗣後遇賑貸之時該

督撫學政令教官覈實開列送地方官詳報即於存
公項內量撥銀米交本學教官散給至各學田
租通融散給俾霑實惠是年寧夏地震壞廨署廬
舍人民官弁亦間有遇災者

命大臣一人馳驛往視發司庫銀二十萬逐戶散賑其
官弁照巡洋被風例

恩賜卹典又定民間遇火災准動存公銀酌賑四年更
定賑濟米數大口日給五合小口半之

向例每名
日給三四

合至六七
合不等

是年免直隸屆征錢糧九十萬江蘇百
萬安徽六十萬及雲南勲莊變價額賦千八百餘
兩以該莊地屢被水沖沙壓難以耕種承變各戶
無可追賠

特諭豁免陝西西安鳳翔同州三府咸寧等十九州縣
水衝屯莊銀米榆林等十州縣民間貸借倉糧悉
予豁免五年免安徽宿州鳳臺靈璧石埭四州縣
雍正十三年至乾隆二年正雜各逋賦豁免河南

中牟等十四州縣水衝沙壓荒地額賦及鄭州地
戶積逋又江南省地丁錢糧漕項蘆課雜稅外有
名為雜辦者沿自前明不在地丁項下編征仍入
地丁項下奏銷款目繁多

國朝賦役全書亦未開載原委及如何征收則例至
是

諭如有款可征即立定章程以杜浮隱之弊其實在缺
額者著該督撫確勘請

旨豁免六年免陝西那克舒三十九部落本年錢糧

按是

年準噶爾來使進藏熬茶那克舒豫備馬匹毫無違誤故加恩寬免其

行圍所經地免本年額賦十之三

謹按乾隆六年為秋巡行圍之始我

皇上愛育黎元特沛殊恩凡經過之地皆免額賦十之三嗣後恭遇

蹕路聖駕

時巡永著為例

又以湖南臨武湘鄉二縣水除坍田額賦

安徽水賑鳳陽潁州二屬飢民七年除浙江錢塘

縣及河南洧川等十一州縣河坍沙壓田賦

詔除天下正項銀米豆草並雜稅租穀逋欠其江浙二

省未完漕項銀米豆麥向不在豁免之例一并免
征又除甘肅省康熙三十年至雍正六年逋賦柳
林湖三清灣柔遠堡毛目城雙樹墩九壩各屯戶
貸欠武威平番永昌古浪西寧碾伯等六縣三年
帶征銀是年黃淮交漲淹民田廬

命大臣會該督撫勘賑動帑千餘萬破格拯濟旋蠲被
災州縣本年應征銀糧江蘇所屬江浦等二十九
州縣衛地丁歲夫蘆課學租等二十四萬九千五

十三兩本色米八千二百石山陽等二十六州縣
衛漕項銀三萬三千五十餘兩米麥豆十有二萬
八千八百餘石安徽所屬壽州等二十州縣衛所
地丁漕項銀十有七萬八百二十餘兩米麥豆千
八百三十六石有奇又續免各災地蠲餘帶征之
賦定凡遇災即行撫卹先賑一月察明戶口按災
分極貧次貧加賑其山西湖廣貴州不分極貧次
貧皆按月給賑江南浙江原分極貧次貧又次貧

其又次貧併歸次貧內凡遇夏秋其災地歲不兩熟與雖兩熟而秋禾不復可種者照秋災例賑風電傷禾苗者亦以秋災論八年

上詣

盛京恭謁

祖陵嘉予各莊頭輸將無誤免本年應交倉糧及上年未完米豆又免那克舒三十九部落應徵明年額賦除湖北興國黃岡二州縣荒田租稅浙江玉環塗

稅

按浙江溫台二洋向為漁船採捕之所自玉環未展復以前汛兵需索漁船陋規無異私稅後

因展復玉環地方官恐經費無出將陋規改收塗稅至是

上諭濱海編氓以海為田著將此項

永遠革除

又免直隸望都靜海冀州武邑四州縣貸種

宿逋及甘肅皋蘭等十二州縣乾隆六年逋賦賑

直隸天津河間深州各屬二十八州縣山東德州

十三州縣飢民其上年因黃淮交漲遣大吏視賑

至此屆停賑之期復令江南督撫察現在水淹未

涸之地按飢民口數酌定月分接續賑卹九年免

肅州九家窰未完牛具銀陝西西寧縣元年未完
馬糧高陵平利二縣五年所貸籽種十年

皇上御宇週旬奉

恩詔普免天下錢糧以十一年為始分省輪免三年一
周其例不入蠲者直隸霸州固安屯糧奉天錦州
米豆浙江玉環山海寧縣大疊中小疊各銀穀甘
肅臨邊各屬芻糧福建臺灣粟米湖南乾州鳳皇
永綏苗民雜糧四川番民貢賦陝西玉樹那克舒

馬貢山西大同朔平二府額徵米穀豆麥亦予

加恩豁免其直隸宣化府屯糧甘肅河東河西各屯免
三之一福建臺灣官莊山西太原等府額征本色
免十之三河南之灘地官莊官地義田廣東官租
學租屯地曠軍餘穀各項均免十分之一

臣等謹按古有賜復之典不過偶見一方洪惟我

聖朝世德相承同符

泰運

聖祖仁皇帝五十年以

國慶綿長普免天下地丁錢糧漕米三年一週

世宗憲皇帝登極又盡除天下逋欠甘肅全免正賦者至

十餘載

皇上御宇週旬復普免地丁錢糧五十年中免地丁錢糧者三次免漕糧者二次

湛恩汪濊樂利恬熙實曠古所未有也

是年除江西樂平德興玉山宜黃陝西洽陽各州

荒田租免江蘇州縣雍正十三年至乾隆元年
未入正項雜賦甘肅寧夏寧朔平樂乾隆三
年因地震所貸耕具咸寧等縣民屯地及更名
地因水緩征銀米皋蘭金靖遠平番靈州
碾伯高臺七州縣乾隆八年未入賦銀糧草
瓜州安插回民未償牛種又以直隸宣化延慶
等州縣山西大同府江蘇安徽所屬偏災加賑
有差十一年

上巡幸山西免

駐蹕之五臺縣明年額賦十之三又以贍對平定凡四
川打箭爐口內外効力各番部給復二年又

特減直隸慶雲縣額賦十之三著為令其浙江雲和縣

坑爐稅廣東瓊州府雜稅福建無著漁課蘇州沿

城屋地租一例永除

先是蘇州城內外居民沿城
構屋賃地輸租後屋毀他徙

租遂逋懸州縣率以罰鍰抵
解至是嚴禁濫罰遂除其租

時江南水免山陽等

二十四州縣衛民屯地漕河租各賦其海州沐陽

贛榆三州縣未入地漕銀米板浦等六鹽場未入
折價銀悉予放除又截漕二十萬石充賑並給銀
葺居以安棲止時山東河南及廣東之廣州肇慶
韶州南雄均被水直隸宣化府甯均如例賑卹十
二年除天津葦漁課以山東水雹免賦銀三十五
萬三千九百有餘江南海溢免災田額賦復除山
陽等二十一州縣乾隆七年蠲餘未完正雜各賦
截山東河南漕運天津北倉米協濟東省共用穀

米一百五十萬石並發帑百八十餘萬兩充山東賑濟江蘇沿海各州縣所被潮災直隸天津浙江杭州江南徐州皆偏災蠲賑如例十三年

上幸山東免

鑾輅所經州縣田租十之三其

駐蹕之曲阜泰安歷城明年額賦全行蠲免時浙江海潮災免漕項銀米以江南崇明縣上年潮災免蠲餘各賦以直隸之慶雲鹽山縣地瘠免歷年貸種又福建陝西旱

詔河南運粟赴陝截江浙二省漕海運赴閩用裨賑濟
其山東鄒平等二十州縣水雲南山西甘肅俱偏
災咸賑如例十五年

上謁易州

陵寢並

幸河南凡經臨州縣未被災者免錢糧十之三被災者
免十之五以祥符為河南省會登封為望秩之所
全免來年地丁錢糧嗣於次年以豫省紳民踴躍

欽定四庫全書

急公免全省十四年以前逋懸共三十五萬時江
南江寧淮安揚州徐州海州五府州水賑被災貧
民十六年

上南巡除江南之武進陽湖二縣開抵田租及江蘇安
徽乾隆元年至十三年積欠地丁銀共二百五十
八萬浙江一省向無積欠蠲正額三十萬以示勸
獎其山東因災借貸籽種銀徐州揚州二屬之興
化沛縣濱湖荒田未淹以前應征逋賦兩淮竈戶

連年逋賦皆以

鑾輅南巡展

恩除之

臣等謹按前明虛田領價後因本戶逃亡株連親族實非原置之田亦非當日領價之戶民間既輸條糧又納役租以致積年拖欠

上省方所至令均照民田一例完納租銀槩予豁免又以浙江向無積欠并蠲除正賦以勸輸將

恩膏稠疊施於常格之外矣

十七年

駕幸木蘭經臨各州縣有被雹災者免田租十之五餘
如例免十之三又免甘肅自元年至十年各項逋
賦除浙江淳安臨海瑞安陝西吳堡各縣坍荒田
租是年浙江旱被災者五十四州縣其直隸山東
福建江蘇安徽山西陝西俱偏災除免賦常賑加
賑外以浙江災重

命截留漕米五十萬石

諭湖廣協濟倉米五十萬石賑糶兼施本折並賑又除
甘肅狄道等十五州縣坍荒田賦免長蘆商通課
銀山西旱給賑如例十八年清覈直隸四旗通判
熱河八溝同知所轄坍荒地畝安徽太平府福建
臺灣府浙江山東竈地各處田地坍荒者咸免科
時淮水漲淮揚徐災河決銅山隄宿遷靈璧虹縣
泗州被淹

命內大臣往視發帑截漕撥運江西浙江湖北湖南河
南山東四川米協濟賑糶又山東掖濰昌邑三縣
風災人給口糧一月十九年

上謁

盛京

陵寢免奉天本年田租其莊頭應納糧石各旗地米豆草芻
免半壯丁米全免時淮安揚州水賑農民竈丁
福建漳州所屬亦水人給口糧一月臺灣澎湖颶

風壞商漁船及民廬舍均

飭大吏賑卹二十年浙江杭湖紹江南淮揚徐水山東
沂州秋禾災各如例賑卹二十一年

上幸闕里

詔免曲阜來年租賦以西陲用兵民勞輸輓免甘州涼
州肅州安西各衛及皋蘭一縣額征銀米草芻寧
夏平涼鞏昌蘭州四府田租免十之三其全省十
一年至十五年逋賦貸種蠲免有差時山東江南

水咸賑如例二十二年

上南巡免江蘇安徽浙江遞年逋賦江寧蘇杭三府本年田租其江南十年以前漕項浙江漕項屯餉沙地公租暨貸租未償者悉除之又免甘肅之涼州肅州安西皋蘭本年田租甘肅十六年至二十年逋賦直隸之滄州靜海南皮山東海豐遞年各項逋賦又以江南淮海徐等屬頻罹水患山東魚臺金鄉濟寧滕嶧五州縣上年被水淹田尚未涸出

除借糶展賑外加

恩將徐淮海三屬新舊積欠及兩淮竈戶逋懸山東魚臺等縣並濟寧魚臺之屯戶逋賦概予豁免是年山東江南加賑展賑早蒙撫卹二省與河南之虞城夏邑商邱永城犬牙相錯而中州獨不言災至是

上垂念該地民風淳樸益用

嘉憫飭該撫速勘積水地畝賑卹一月至五六月間會

中州復水涸出補種之秋禾亦淹乃令除虞城夏
邑商邱永城四縣田租二年免四縣積逋又

諭辦理水利河臣會同督撫查明被災戶口無論極貧
次貧概予一月口糧嗣後陸續奏報汲縣淇縣封邱
中牟陽武新鄭武陟原武輝縣滑縣新鄉延津獲
嘉許州長葛祥符皆被水壞民田廬

命撥江西湖北米協濟本折兼賑增折直並以工代賑
越明年二月賑垂畢

上復諭曰譬如赤子在慈母之懷未能強飯遽斷其乳
其何以堪其再加賑一月又是時漳河暴漲注衛河
山東直隸被水江南上下亦被水甘肅雨雹山水
大至咸賑如例二十三年免甘肅十六年至二十
二年逋賦以河東西旱本折兼賑增折直河東十
之三河西十之四展賑至來年七月二十四年皋
蘭等二十五廳州縣秋禾復災其折賑視上年再
各增十之三仍分別展賑時又賑山西陽曲等三

十州縣貧民二十五年免甘肅田租以新疆底定
大兵凱旋再免明年田租其江南之淮揚徐海四
府州縣及山東湖南甘肅州縣間被偏災咸賑如
例二十六年

上幸山西五臺免

經臨駐蹕之地租賦十之三其五臺縣二十四五兩年
所貸倉穀石數與陽曲縣緩征帶征各銀穀概予
豁免又免直隸宣化府八年至十三年逋賦時黃

河溢祥符等縣災

命大臣會該撫散賑其直隸之大名天津山東之德州
曹州亦水皆截漕充賑雲南新興江川二州縣地
震照例賑倍給之二十七年

上南巡免

駐蹕之江寧蘇州杭州三府附郭諸縣本年租賦其安
徽江蘇浙江三省先年因災緩征及地丁之未入
者如例蠲免其浙江民屯田租漕賦竈課諸逋負

並兩淮竈課帶征銀及

經過畿輔等處地方應征額賦分別蠲免

迴鑾後復將直隸大興等十州縣廳所有節年未完分別緩帶之項其自十二年至二十五年逋欠地糧改折屯糧等項概予豁除其自十九年至二十五年因災緩征帶征地糧改折屯糧等項再分作三年帶征是年賑直隸四十五州縣山東甘肅各三十州縣衛所飢民三十年

上謁

東陵途次周諏以直隸上年秋霖過甚令再行加賑其災較輕與不成災之州縣亦予加賑是年

南巡江浙

鑾輿經臨州縣復免田租十之三三十一年奉

恩詔湖南湖北江西浙江江蘇安徽河南山東應輸漕米照康熙三十年例按年分省通行蠲免一次

臣等謹按起運漕米例不減免惟我

聖祖仁皇帝五十年通行輪免一次今

皇上詔令分年普免至四十五年又普免一次間閭蓋
無不享盈寧之福矣

三十二年

上幸天津免該屬節年尾欠並緩征出借未完銀米旋
諭翠華所至郊圻黎庶共切近光着將直隸通省節年
尾欠未完民地屯糧等項銀穀一體蠲免是時大兵
進征緬匪令於雲南通省州縣衛及十九姓土司

本年地丁錢糧普行蠲免其湖南湖北貴州三省
所有軍行經過地方錢糧亦予緩征明年令直隸
河南湖南湖北貴州五省所有軍行經過處本年
地丁錢糧概予緩征時安徽之合肥等十六州縣
衛旱凡新舊漕項錢糧及歷年貸欠均予停緩本
年民衛屯地錢糧各按災分蠲免其未蠲應征之
項仍分年帶征被災軍民及各學貧生一體本折
兼賑缺籽種者貸其直隸霸州保定等十二州縣

窪地水河南光山等七州縣旱蠲賑如例三十四
年加賑直隸河南安徽被災各州縣時湖北江湖
驟漲武昌漢陽所屬被淹

飭大吏加意撫卹其進征緬匪兵屯經過之處應征地
丁錢糧

詔令分別蠲免在雲南辦理軍需地方免十分之五直
隸河南湖北湖南貴州經過各州縣免十分之三
三十五年

皇上六旬萬壽越明年

皇太后八旬萬壽

詔普免天下錢糧其芻糧等項例不入蠲者仍

加恩分別蠲免隨

諭直省督撫遇輪免之年照應免糧銀十分之四令食
力佃農準直減租時古北口山水漲發壞兵民田廬
命大臣馳往撫卹前後撥內庫銀四萬並發倉協濟賑
糶旋

命直隸總督楊廷璋遴選大員察勘東安寶坻十一州
縣窪地被淹之處加意撫卹於是截漕二十萬石
陸續撥通倉米四十萬發內庫銀七十萬銀米兼
給其撥運內庫銀兩舊例除俸餉外俱有應扣秤
餘不必悉照部頒法馬

上諭賑卹以蘇民困其事較俸餉尤重將此次所動帑
銀即於庫貯元寶如數發往嗣後如遇賑卹之項俱
照此行永為例是年

上幸天津免天津所屬及經過州縣節年未完銀穀及直隸一省三年前積欠共計三十一萬有餘三十九年

上巡幸山東免經過州縣本年額征錢糧十分之三其上年被災之處免十分之五其直隸之武清等十五州縣因災借貸穀十萬有餘山東濟南等六府屬因災支借麥本銀十萬八千餘兩全予蠲除又以浙省濱海屢被潮患自常賑展賑外即不成災

地畝亦予撫卹又直隸水甘肅偏旱截漕五十萬
撥通倉米三十萬部庫銀五十萬賑直隸陝西
藩庫銀三百萬倉米三十萬賑甘肅又向例屆蠲
免之年即遇災歉亦不再蠲

上念甘肅地瘠民貧將被災州縣展至明年按分蠲免
其該省積欠倉糧四百四萬餘石全行豁免除其米
銀分作六年帶征是年除臨清及陵縣沙壓鹽鹵
地畝震澤縣坍沒公作田蕩租賦三十七年緩征

四川兵過州縣及直隸山東上年被災州縣錢糧
又加賑去年山東偏災及各省偏災貧民三十八
年緩征四川湖南陝西等省兵過各州縣錢糧及
撥調湖廣各營官兵經過州縣漕米又以肅州高
臺撫彝安定金縣五廳州縣皆經兵過輓運之所
免本年額征錢糧十之四其黔省運送軍裝亦分
別緩征又免天津府屬積欠及直隸省上年被災州
縣積欠時黃河北岸湖水盛漲會黃下注河南正

陽等府縣及江南清河桃源安東三縣大河淮安
衛泗州鳳陽等屬洋津里河二處莊地俱被
水又陝西間被偏災各如例賑卹又加賑甘肅皋
蘭等五州縣以漕運總督嘉謨請豁免太倉等州
縣所有坍沒田畝租賦并捐義塚地畝應征銀米
以湖北巡撫陳輝祖請豁免監利挽築月提挖壓
田畝糧賦以安徽巡撫裴宗錫請豁免鳳陽泗州
等屬被水田畝應征糧銀三十九年加賑陝西河

南安徽江蘇四省上年被災各州縣除江西新昌
寧都等五州縣坍沒荒田及江蘇江浦縣坍沒屯
田租賦以上年黃水漫溢免山陽清河鹽城阜寧
四縣明年應征錢糧其四縣暨淮安太河二衛本
年漕糧漕項銀米一體分別蠲免又令緩征川省
兵過地方錢糧及番民認納夷賦銀米貢馬等項
尋以大功指日告成

諭該省沿邊番民及十姓土司所有遞年緩征夷賦貢

馬分別酌免是年逆賊王倫滋擾山東壽張臨清數
州縣彌月勦平

命該督撫查明加意撫卹分別蠲免其直隸甘肅安徽
江蘇俱偏災咸賑如例四十年緩征甘肅積欠其
直隸上年被災州縣並毗連災地錢糧概予緩征
又加賑直隸甘肅安徽江蘇四省飢民四十一年
以金川蕩平

命四川總督文綬會同將軍阿桂將全省節年應征緩

征帶征錢糧及番民雜項查明差務繁簡分別酌免又以

武功耆定

親謁

兩陵祝

釐東岱所過直隸山東除如例免租外並令二省遞年緩

征帶征稱貸銀數雜項酌定蠲免

計直隸免銀十萬六千餘兩穀

米豆麥共十萬餘石山東免銀九萬一千六百餘兩穀米十有三萬石

其江南被災

州縣漕糧分別展限四十二年

詔普免直省地丁錢糧自四十三年起計三年輪免一
週其不在蠲免之例者仍令分別蠲免

臣等謹按普免天下錢糧為從古所未有
聖朝累洽重熙頻加恩賚茲復推廣

聖慈將天下地丁錢糧再輪免一次

厚澤深仁淪肌浹髓尤

推恩錫類之曠舉也

時又以甘肅屢被旱災豁免歷年積欠加賑上年
甘肅安徽偏災州縣四十七年以山東歷城等十
九州縣河南汲縣淇縣臨漳三縣甘肅皋蘭三十
二廳州縣上年被災業與蠲緩借貸賑卹

上又念民氣未蘇

加恩免山東河南被災州縣額賦十之四其甘肅災民
展賑二月是年黃河漫口被水州縣奉

旨截漕二十萬又留豫省新漕十萬石並先後撥兩淮

鹽課銀百萬戶部庫銀六十萬

命大員前往董率有司賑卹又湖北安徽江蘇甘肅間
遇偏災動湖北藩庫存貯銀百八十萬並撥內庫
銀三十五萬賑濟湖北其安徽等省借貸賑卹俱
如例行四十五年

上七旬萬壽

詔免天下漕糧以庚子年為始如例輪免其漕項款內
例征折色及民戶輸銀官為辦漕之項一體蠲免

又

上幸盛京免奉天所屬本年錢糧及雜項米豆以甘肅
屢災免二十七年至三十七年帶征未完銀米河
南數被水緩征本年地丁錢糧時河南撫臣奏中
州漫淤未退現奉

恩詔於庚子為始普免七省漕糧請即於今歲先將豫
省漕糧概

賜蠲免其儀封考城等五州縣上年緩征漕糧亦請展

至四十五六兩年分年帶征從之四十五年仍以漫口堵築未竟將被災較重之儀封考城等十三州縣接賑數月其河南未遇災州縣暨上下兩江甘肅上年偏災各州縣均予展賑其河南上年應征錢糧緩征至本年者被災各屬仍行蠲免餘俱分作三年帶征是年

上巡幸浙江

鑾輅所經直隸山東江南浙江四省地方如前免地丁

錢糧十分之三其該地每年積欠銀糧暨商場通

課概予蠲除

直隸順德等府屬所除積欠穀米豆九萬餘石折色銀十萬兩山東歷城

等州縣銀十三萬兩穀麥萬餘石江寧藩司所屬銀四十五萬二千餘兩米十七萬餘石蕪州藩司

所屬銀二萬三千餘兩米十二萬九千餘石安徽藩司所屬銀四萬餘兩米穀麥十餘萬石兩淮

戶節年未完銀三萬五千餘兩兩淮商民應完川餉未繳銀百二十萬兩浙江歸安仁和等縣銀五

萬四千兩米穀二萬石有餘

時直隸水武清房山等四十一州

縣偏災截漕三十萬撥通米三十萬撥部庫銀三

十萬與該省現貯銀米協濟賑卹四十六年免直

隸順天等七府二州節年因災緩征及借貸未完
銀穀米麥加賑江蘓安徽河南上年被水災民時
黃河南北兩次漫溢浸及江南山東瀕河各州縣
又直隸天津等處低地間有積水俱如例賑卹先
是甘肅連年被旱准開捐監例征收本色以資賑
卹其後布政使王亶望等私收折色銀捏災冒賑
上令確查歷年冒賑分肥之員俱以法論復
諭各督撫毋得因此諱災不報乃

諭該督臣派委明幹大員查勘本年被災之處即不成災者亦予撫卹續經奏報寧朔平樂等州河水泛溢秋禾被災即照例賑卹又屢

飭直省該督撫遇有歉歲即據實奏報不得因噎廢食時大兵進勦逆回其用兵之蘭河二州本年錢糧通行豁免又每人給倉穀三斗加賑一月其為逆回焚掠房屋耕具牛馬者均令給銀人口被傷者查明撫卹四十七年加賑直隸河南山東甘肅江

南上年被水各州縣尋以黃河漫口未堵令將被
水較重之州縣不限月分常予賑卹俟堵築後停
止四十八年豁免河南山東所有開挑引渠歷次
酌增夫料銀共一千六十餘萬甘肅歷年緩征積
欠銀一百六十餘萬是年陝省榆林懷遠葭州神
木綏德米脂吳堡府谷等八州縣秋禾被災除將
應徵錢糧分別蠲緩外即著於地丁項下撥銀四
萬兩以備賑卹之用其未成災之清澗靖遠二縣

所有本年額征并上年緩征未完及新舊借欠常
社食糧俱著來年征還又蠲免直隸節年民欠耗
羨銀三萬二千七百餘兩又以江南被水最重之
沛縣豐縣銅山邳州四處不論月分常予賑卹其
餘被災稍輕州縣不在常賑之例者俱分別加賑
又因河南之儀封考城陳留三縣北岸被淹於展
賑外加賑二月又以山東兗州曹州二府屬及濟
寧州所屬連年被淹其最重之州縣不論月分常

予賑卹其次重之各州縣俱加賑一月又加賑安
徽被水之鳳陽潁州二府並泗州等屬一月四十
九年

諭上年陝西榆林綏德二屬秋禾歉收節經降旨令該
撫加意撫卹並加恩照乾隆二十四年散給折色之
例優予賑銀災黎自可不至失所第念今春正賑已
畢地氣寒冷並無冬麥大田收穫較遲民食仍未免
拮据復加恩將榆林蔚州懷遠府谷神木綏德所屬

之米脂吳堡所有被災極貧戶口展賑四月次貧戶口展賑兩月以資接濟五十年

上幸盤山免經行地方本年正賦十之三是年豫省雨澤稀少糧價日增撫臣畢沅以河北一帶各屬倉石因連年積歉蠲緩散給存貯無多請於豫省應行起運米豆內截留十餘萬石並於山東起運漕糧內就近截八萬石以備接濟

上諭河南衛輝一帶近歲被有旱災疊經降旨蠲免展

賑現在未得雨澤自應寬為儲備著於豫東兩省內
截留漕糧三十萬石如東省漕糧不敷著即於就近
各帮撥給又

諭明興奏曹州東昌濟寧臨清各府州屬雨澤稀少地
方未經播種者尚有三十州縣東省倉貯歷年蠲緩
借出存貯無多請截留南米寬裕儲備等語著於南
糧頭進在後各帮內截留二十萬石存貯濟寧聊城
水次以備應用又

諭江蘇徐淮海三屬本年雨澤愆期二麥歉收所有被災最重之銅山豐縣沛縣蕭縣碭山邳州睢寧宿遷安東阜寧桃源十一州縣實在貧民著借給三個月口糧次重之清河鹽城海州沭陽贛榆五州縣貧民借給兩個月口糧以資接濟再該處州縣倉石頻年賑貸存貯無多其淮安一屬著該督撫就近酌撥調濟所有徐海二屬著即於邳宿一帶水次截留漕米十萬石以八萬石分撥徐州各屬二萬石分撥海州

各屬以備賑貸之用

諭安省毫鳳等屬上年被水歉收本年復雨澤愆期業經分別借給籽種口糧以紓民力今尚未得透雨著照書麟所請於三進幫船內截留漕糧五萬石存貯備用

皇朝通志卷八十七

欽定四庫全書

皇朝通志卷八十八

食貨畧八

平糶

常平倉

義倉

社倉

臣等謹按平糶之法所以酌盈劑虛使穀價常得其平故歲豐增價而糶以便農歲歉減價而糶以便民是為常平倉法其可與常平相輔而行者則莫如義倉社倉顧自漢唐以來積弊相沿有儲備

卷八十八
之名無平糴之實者比比而然洪惟我

國家雨暘時若年穀順成豐穰之庾超軼往古

列聖軫念民依綢繆未雨由省會以至州郡俱建常平倉
鄉村則設社倉市鎮則設義倉而近邊有營倉之
制瀕海有鹽義倉之制所以預為之備者無處不
周矣至於截漕協採勸輸通糴諸法又復委曲周
詳措施盡善洵非前代言積貯者所可幾及茲纂
依鄭氏平糴之志敘列常平諸倉合為一卷

崇德元年

上命戶部承政英俄爾岱瑪福塔傳諭八家各出糧百石
平糶旋又令固倫公主和碩公主和碩格格及官
民富饒者凡有藏穀俱令平糶六年都察院參政
祖可法上言二事一請杜囤積之弊有糧之家或
賣或借俾得有無相濟賣則從市平糶借則從時
起息不許坐擁多儲妄希長價一請開納粟之例
或論罪之大小限以米數捐贖或無罪之平人有

急公輸粟者量加獎錄俟秋成豐稔停止從之

順治四年江西水旱令發倉米三千餘石減價平

糶十一年近京地飢

上諭賑濟大臣曰米價騰貴飢民得銀猶恐難於易米殷實之家有能捐穀麥或減價出糶以濟飢民者先給好義匾額及羊酒幣帛以示旌表又令各州縣常平義倉社倉兩次造冊報部部臣按積穀多寡定有司功罪十三年令各省修葺倉教并印烙倉斛選擇倉書糶糶平價不許別項動

支十七年定倉穀糶糴之法凡春夏出糶秋冬糶還平價生息務期便民一遇凶荒即按數散給災戶

康熙四年禮科給事中黏本盛請飭地方官通糶以便民食從之六年准甘肅積貯米石變價另糶新穀以免浥爛五年陝西巡撫賈漢復請將西安等四府積穀變價生息

上以出陳易新原以為民若將利息報部反累百姓

詔停止生息十八年令各地方官修常平倉每歲秋稔勸

諭官紳士民捐輸米穀照例議叙鄉村立社倉市
鎮立義倉公舉本地善良之人出陳易新春貸秋
還每石取息一斗每歲杪州縣核數申詳上司上
司報部儲穀多者管倉人給與頂帶官吏培克者
照侵欺錢糧例處分強派抑勒擾民者罪十九年
又定常平積穀留本州縣備賑義倉社倉積穀留
本鎮備賑永免協濟外郡時以浙江杭州等府米
價騰貴動庫銀四萬兩往湖廣江西糴米平糶又

令奉天等處城守征收雜稅於米價賤時購貯
內倉遇緊急撥用名曰備米嗣後近邊境地如山海
關古壯口張家口黑龍江墨爾根奉天錦州開元
遼陽蓋州及榆林等處衛堡俱有貯備倉庾特行
於常法之外二十一年

命州縣衛所官勸諭積貯以米穀多寡定議叙三十年截
漕米十萬石令於江寧京口等處駐防之地建倉
存貯三十一年直隸永平所屬及豐潤玉田等縣

米價騰貴

諭令發各王莊屯米轉糶三十二年西安米貴令戶部招募殷實商人給以正項錢糧於各省購米運往發糶其利息聽商人自取俟該省價平但收所給原本時畿輔米貴

諭大學士等每月發通倉米萬石減價出糶禁商賈販囤
三十四年

盛京旱

諭令支海運米二萬石一半賑給一半出糶嗣後直屬遇
災即發京通倉米或截留漕米並貯以備賑濟餘米視
時價減糶直省遇災除如例賑卹外或多截漕米或借
撥庫銀向鄰近歲豐之省糶米平糶四十一年以直隸
各屬所設常平等倉不敷賑濟令於各村莊設立
社倉如直隸行之有效各省即照例行尋以廷臣
議定社倉之穀於本鄉捐出即貯本鄉令誠實鄉
民經管上歲謹收中歲糶借易新下歲量口發賑

嗣後直屬陸續勸捐米穀七萬五千四百餘石出借得息米千五百餘石俱令於各屬社倉存貯其直省各州縣常平等倉存糶數目向例大州縣留一萬石中八千石小六千石至四十三年乃按各省形勢食指多寡分定大中小存糶四十三年以河南居數省之中宜廣積倉貯以備山陝賑濟之需乃將上年兌征漕米二十三萬二千八百餘石每石易穀二石分給河南府及近汴近洛之祥符

中年汜水鞏鼎澠池偃師陝州靈寶閭鄉等處造
倉收貯嗣後於江南浙江兩省開捐監例定額貯
倉貯足即止五十四年令直省勸輸社倉按數多
寡分別旌賞

雍正元年飭直省督撫查核存倉米石其蓄積未
多之處令比歲勦帑採穀增益二年奉

諭旨備荒便民之舉莫良於社倉但勸導設建當俟屢豐
時隨民多寡利息從輕取償從緩倘值歲歉即與展限

一切條約有司不得預干至積穀漸多督撫亦止具摺
奏聞不必造冊題報致社倉頓成官倉其時督撫務求
速效多有令州縣於應輸賦一兩者加納社倉穀
一石且以貯穀之多寡定牧令之殿最

上聞諭曰是何異於正賦外每兩加收四五錢火耗耶該
督撫宜會同司道府等官妥議務得安民經久之法嗣
後復奉

諭旨奉行之道宜緩不宜急宜聽百姓自為之不當以官

法繩之續經議定有司勸捐不得苛派所捐之數立冊
登註不拘升斗如有捐至十石以上者給以花紅
三十石以上者給以匾額五十石以上者遞加獎
勵其有年久不倦捐至三四百石者給以八品頂
帶每社擇立品端方家道殷實者設立正副社長
果能出納有法十年無過亦題請給以八品頂帶
其收息之法本穀一石收息二斗小歉減半大歉
全免至息倍於本祇以加一行息

乾隆三年議定
每息十升以七

升歸倉以三升給社其出入斗斛遵部頒公平較
長作收倉折耗之費

量每歲四月出貸十月完納每社設用印官簿二
本一社長收執一繳州縣存查凡州縣官止聽稽
查不許干預出納如有抑勒強借糶賣侵食等弊
許社長首告各督撫於一省之中先擇行數州縣
俟一二年後著有成效然後行於通省三年直省
俱豐稔

命各督撫遵行社倉之法於是社倉之制大行江蘇巡撫

何天培疏請預造排門細冊存案凡借貸散賑如
有不務農業遊手好閒之人不許借給其正副社
長外再舉一殷實者為總領積穀既多恐滋浥爛
應於夏秋之交減價平糶秋後較時價買補從之
尋定各省存倉米改易稻穀後於歸化城土拉庫
等各建備貯倉於兩淮浙杭建鹽義倉於江南之
泰州通州如皋鹽城板浦近鹽社地方建倉六所
以濟貧苦竈戶江寧蘇州常州鎮江四府另建府

倉直隸之喜峰口貴州之古州都江廣東之南澳
鎮右營澄海海門達濠等營惠來平海大鵬等營
及潮州城守三營鎮標三營提標五營督標並水
師六營肇慶城守營瓊州鎮瓊協龍門協香山協
虎門協廣海賽四川之潘州協標達建等營及新
設苗疆之河西七兒堡俱建倉豐儲五年以湖廣
積貯較他省獨少令照江浙現開捐監之例收捐
本色貯倉以備東南各省撥運平糶之需六年按

八旗分數設立二十四米局通州二翼設二米局
令旗丁餘米欲售者以時價收及其欲買則以平
價糶川陝總督岳鍾琪請以陝省耗羨銀內撥發
各州縣採買穀麥廣建陝省社倉每社貯一千石
從之是時陝省官員每以收貯在官即是公物未
便付之倉正倉副但令里甲押運七年岳鍾琪請
頒明詔交該督撫恭錄鐫石每倉頒發一本并擬社倉條
約亦請發各社倉使鄉愚共曉

上如所請行八年於五城通州各添設米廠俟昂貴時減價出糶十年大學士鄂爾泰言甘州涼州肅州為軍需會齊之地倉儲緊要請將見行捐納款項改折本色糧石

上以本地採買恐價直騰貴轉於軍民未便乃令除本地民人以所有糧石交納外其他處交納人等俱在別處運交不得於甘州涼州肅州採買十二年

諭各省設立社倉以便濟用近聞直隸百姓借領社穀必

俟督臣咨部而後行往返動經數月小民守候維艱嗣後但當先發咨報存案著為例十三年以雲南各屬社倉貯穀多不滿千石議將各屬常平倉及官莊等穀內動撥或五百石或八百石作為社本按地方大小以足千石以上之數時內閣學士方苞言倉穀每年存七糶三設遇穀價昂貴必待申詳定價窮民一時不得邀惠嗣後請令各州縣酌定官價一面開糶一面詳報俾民早沾實惠從之

卷八十八
乾隆元年禁糴買派累之弊增設河標四營及廣東左翼鎮標營倉二年京城米價稍長

特旨發通倉米於五城共設十廠六居城內四居城外減價平糴尋又於近京四鄉添設八廠明年移內城六廠於城外關廟添設崇文門宣武門外米廠永定德勝二門中間米廠又於城內添設米廠三處平糴定各處無論常平社倉借穀歉歲還倉概免加息四年西安巡撫張楷奏社倉事例一社

長定三年更換以杜欺弊一春借時酌留一半以防秋歉一限令每年清還兼收麥石一粘貼借戶穀數姓名以除捏冒一令地方官稽查交代分賠以專責成又設立浙江福建四川各屬營倉明年河道總督白鍾山請於黃河南北兩岸照標營例設立河營倉以利河兵堡夫嗣後河南山東諸營俱建營倉七年

申諭遏糶之禁令各州縣買補倉穀時值歲歉價昂不

能買補而該處所存尚可接濟准其展至來年買
補若穀價不敷而貯倉又係不足該州縣即詳明
上司以別州縣穀價之盈餘添補採買為酌盈劑
虛之計其減價出糶在尋常出陳易新之際照市
價每石核減一錢若歲荒價昂該督撫即臨時酌
量不拘減一錢之數其平糶亦視歲歉輕重毋拘
存七糶三成例凡奸民賤糶貴糶之弊仍有例禁
又令山東行銷票鹽地方分上中下三等照票輸

穀其章邱濟陽萊蕪淄川新泰德平鄒平商河臨
邑惠民十縣列為上等每粟輸穀二石陵縣齊東
陽信長山博山樂陵青城臨淄樂陰臨朐益都高
苑沂水費縣十四縣列為中等每粟輸穀一石五
斗莒州新城博興濱州蘭山海豐樂安蒲臺日照
霑化利津壽光昌樂濰縣郯城十五州縣列為下
等每粟輸穀一石通計輸穀二十萬五千九百七
十八石分限二年交倉照社倉例施行九年以直

隸米貴令於通州盧溝橋沙河黃村四路分設四

廠平糶仍於通州設兩局糶賣官米

按通州向設兩米局收買

俸米以備平價之需嗣於雍正十三年併歸一局至是復開兩局

是年置河南營

倉十一年置山東營倉十三年

諭直隸常平積聚之數悉準康熙雍正年間舊額其加

貯者以次出糶至原額而止十六年

聖駕巡幸江浙先期

命兩省截留漕糧二十萬石以資平糶嗣後遇

南巡盛典即照為例十七年停止八旗及通州二翼米局二十三年准運丁餘米在通州出糶二十六年令甘肅省設立府倉明年又令甘省建鄉倉十八年戶部侍郎英廉言京通倉貯最宜充裕而頻年截漕散賑動以億萬計間遇京城糧價昂貴輒發

內倉廣為平糶截留之數既多儲積之數自減請於湖廣江西江南浙江四省開捐貢監收納本色或

以三年五年為限捐有成數另行收貯遇截漕之年即於次年照所截之數補運京倉廷臣議如所請遂令該督撫將見在穀價酌中定議並一應年限撥運事宜酌定具奏於是安徽巡撫託庸請將見存常平倉穀先行碾米附漕船運京以捐監本色隨後補倉

上諭三農生穀祇有此數採購於官庾捐輸於紳士條款雖殊其為地方所產則一與其輾轉挹注曷若留

之民間若一概豐貯恐小民未獲糶貸之利先受目前食貴之艱譬諸日食四鬴者先奪其三而語之曰吾將為爾他日待哺計也彼不生感而生怨矣國家昇平富庶內府外府均為一體凡官廩兵糈歲支之數豈缺於供若以補漕糧而議捐穀又因議捐穀而先運常平倉儲不獨徒費輸輓之勞且他省聞風踵事地方因緣壟斷必致米價湧騰閭閻轉滋弊累揆之經常不易之道惟為民食留其有餘國用自無不

足居今承平日久戶口增而產米祇有此數倘遇必
資通融協濟之處亦不過臨時善為補救而已所有
碾運常平倉穀之奏不必行其江浙四省捐納貢監
之例並停止嗣於三十年託庸又以安徽所屬倉額
撥碾後缺至四十萬買補維艱請於各屬捐監酌
量減收本色以補倉貯尋議准令減三報捐至徽
寧地僻准令減四粟穀兼收俟額足即止凡外省
營販寄居者不準報捐本省人亦不准折色時以

直省府倉收放俱委州縣不免迴護隱徇令改歸
首邑經理知府祇許照例盤查毋庸干涉三十一
年停止陝甘直隸安徽山西河南等省捐監事例
其各省倉穀缺額俱令動庫項買補如庫項不敷

採買該督撫隨時奏請撥給

時因陝甘捐納多係折色轉向民採買令

將見發帑三百萬兩存留甘省之項陸續購足以崇積貯實政於是併安徽等省亦如之

三十

三年停止福建雲南廣東三省捐監貯倉事例三
十四年以直隸近水州縣窪地被災撥通倉米二

十萬石散各處平糶又雲南因撥運軍糧各屬倉穀缺額今將該地方有永折改折抵條各項米悉征本色抵補倉額先是通州設立米局凡王公大臣官俸聽其出售通州戍人因私立米局漸滋弊端至是御史屏治奏請清理積弊以平米價乃令步軍統領會同順天府尹將該地米局十餘座永行停止其王公大臣官俸令兵弁解京交納三十五年以歲屆夏閏秋成稍遲近畿米糧不敷接濟

將王公大臣秋季俸米先期支放以平市直又以
入夏雨少撥京倉米給五城平糶令步軍統領派
委員役嚴緝奸商販買囤積是年於古北口地方
添建倉貯八萬石三十六年

諭積貯既屬充盈新陳亦當量為出易若兵食寬裕則
餘糧可贍及閭閻自為一舉兩得著將該地駐防八
旗兵丁及城守營提標各營綠旗兵丁應支月糧每
年支給兩季本色三十七年畿輔麥收歉薄

諭河南山東撫臣各購麥十萬石運京供糶並令山東
仍弛海禁四十年京師糧價昂貴令照例撥京倉
米給五城設厰平糶先是川省因辦理軍需購糧
較多該督撫因請暫停夔關出米以供軍儲至是
大功將成而督臣文綬猶請將川地所產雜糧飭
夔關一併截留

上諭川省產米豐饒向由湖廣一帶販運而下東南各
省均賴其利今軍儲充盈採買漸少又本年江蘇安

徽俱被偏災米價不免昂貴正應將上游糧食源源
販運毋許再行禁遏四十三年山東巡撫國泰請社
倉春借時地方呈報州縣批交社長支發秋還時
由州縣開單交地方按戶催完每歲杪責令州縣
親赴四鄉盤查

上諭此是在官又添一常平倉矣社長侵漁原不能免
然因此而官為經營則書役地保之藉端勒索更甚
惟仍舊令督撫飭州縣實心稽核期得實濟無事更

張是年復於五城設厰撥京倉米麥平糶四十四年
國泰言東省本年二麥豐收積年民欠倉穀請以
麥六斗抵穀一石交倉嗣後東省倉穀多有以麥
易者是歲湖北早該省大吏咨商川省川督文綬
請於水次州縣各倉撥穀數十萬碾米運楚

上以文綬意欲以官運倉穀塞責實則不欲夔關之米
出境意存畛域因

傳諭文綬令其將水次倉穀碾米撥運江南

向來江南
下游仰給

川省會前歲江南又歉收故有此

諭

并令曉諭楚省商販聽其照

常轉運無得阻滯其途經楚省之米亦令該督撫任其販運各處發賣四十六年江蘇崇明縣被潮民多拮据將本年應行起運糧米內截留十萬石平糶又以徐州府屬被灾較重撥藩庫銀五十五萬兩及鹽課銀五十萬兩以資賑卹尋截留漕糧五萬石以備平糶四十七年直隸承德府雨澤偶愆糧價稍昂陸續發存倉餘米六千石平糶是時

直隸各倉因賑濟額缺將天津存漕米九萬二百三十二石撥補是年又以山東兗州曹州府屬被水截留漕米五十萬石接濟四十八年准四川未經變價之義倉穀存貯民間以資接濟又於江浙各兌漕米內截留二十萬石分貯平糶五十年上諭上年湖北安徽江蘇等省被旱屢經降旨加恩賑卹並為之籌酌調劑令將四川江西米石接濟各省俾商力流通以平市價

命川督李世傑飭該處州縣碾運常平倉穀接濟下游
各省

皇朝通志卷八十八